

ՆՈՐ ԺԱՄԱՆԱԿԻ ԿՐԹՈՒԹՅՈՒՆ ՀԿ



ՀԵՐԹԱԿԱՆ ԱՏԵՍՏԱՎՈՐՄԱՆ ԵՆԹԱԿԱ ՈՒՍՈՒՑԻՉՆԵՐԻ ՎԵՐԱՊԱՏՐԱՍՏՄԱՆ ԴԱՍԸՆԹԱՑ 2022

ԱՎԱՐՏԱԿԱՆ ՀԵՏԱԶՈՏԱԿԱՆ ԱՇԽԱՏԱՆՔ

Հետազոտության թեման՝ Բարոյական արժեքներ

Առարկան՝ Անգլերեն

Հետազոտող ուսուցիչ՝ Հասմիկ Սողոմոնյան

*Ուսումնական հաստատություն՝ Անտոն Զեխովի անվ հ.55
դպրոց*

Երևան 2022

ԲՈՎԱՆԴԱԿՈՒԹՅՈՒՆ

Ներածություն-----	3
1. Արժեք եզրույթը, սահմանումները-----	5
2. Համամարդկային արժեքները, դրանց տեսակները -----	8
3. Բարոյական արժեքներ-----	17
Եզրակացություններ-----	19
Օգտագործված գրականության ցանկ-----	20

ՆԵՐԱԾՈՒԹՅՈՒՆ

Հետազոտական թեմայի արդիականությունը և կարևորությունը. Արժեքը, աշխարհի յուրահատուկ ընկալումն է, որը ձևավորում է գիտելիք, վերաբերմունք, հմտություններ որևէ երևույթ մեկնաբանելու, որևէ հիմնախնդիր վերլուծելու կամ այլընտրանքային լուծումներ առաջարկելու նպատակով:

Մշակույթը խիստ կապված է մարդու արժեհամակարգի հետ: Նեղ իմաստով արժեքը մարդու համար, իրի, առարկայի կամ երևույթի դրական նշանակությունն է: Արժեքը մարդու վերաբերմունքն արտահայտող ցուցանիշն է, որի կարևոր կատեգորիաներից են՝ հավատն ու սերը: Ժամանակակից կյանքում մշակութային քաղաքական սոցիալական փոփոխությունների հետ մեկտեղ փոխվում են մասն անձի արժեքները, աշխարհընկալումները, ինչպես նաև աշխարհի, մարդկանց բնության հետ հարաբերությունները:

Սույն թեմայի *արդիականությունը* պայմանավորված է նրանով, որ այժմյան հասարակությունում ավելի արդիական են դառնում մարդու արժեքային կողմնորոշումները, մարդ-հասարակություն փոխհարաբերությունները հասկանալու և վերլուծելու միտումը, արժեքների տեղը և դերը՝ որպես անձի ինքնություն բաղադրիչներ դիտարկելը: Հասարակությունում ամկա արժեքները և նորմերը ձևավորվում են տարիների պատմական և մշակութային զարգացման ընթացքում, ինչն էլ վկայում է այն մասին, որ արժեքների ձևավորումը մշակույթի ազդեցությունն անմիջականորեն իր վրա կրող գորցընթաց է: Խնդիրն արդիական է հատկապես հայկական հայ հասարակության տեսանկյունից:

Անցումային հասարակությունը փորձաքար է յուրաքանչյուր ազգային ինքնության համար: Այն բացահայտում է արժեքների այն ամբողջությունը, որով տվյալ համակեցությունը փորձում է ինքնահաստատվել կենսական նոր հանգամանքներում: Ազատ շուկայական հարաբերություններ և քաղաքացիական հասարակություն ստեղծելով արդիականանալու հայկական սոցիոմշակութային դաշտը ևս փորձարկվողի վիճակում է: Նոր մարտահրավերներին մեր արձագանքի ազգային առանձնահատկությունները հստակ դրսևորվում են անհատական կեցության և ընդհանրական շահերի փոխհարաբերության բնույթով: Ցավոք սրտի, մեր մեջ դեռևս ամրակայված չէ պետականության շահի գերակայության գիտակցումը: Դա հստակ արտահայտվում է ընտանիքը, հոգևոր արժեքները, հոգևորականությանը, պետական կառավարման ինստիտուտները և այլ արժեքներ իմաստավորելու հայկական

ավանդույթի մեջ: Ինչպես սոցիական ու տնտեսական, հասարակական ու քաղաքական համակարգի մյուս ոլորտներում, հասարակական արժեհամակարգի:

Աշխատանքի **նպատակն է** ուսումնասիրել բարոյական արժեքները:

Աշխատանքի **խնդիրներն են**.

- Ուսումնասիրել արժեք հասկացությունը
- Ներկայացնել համամարդկային արժեքները
- Քննել բարոյական արժեքները և դրանց սահմանները:

1. Արժեք եզրույթը, սահմանումները

Աքսիոլոգիան փիլիսոփայական դիսցիպլին է, որն ուսումնասիրում է արժեքների կատեգորիան որպես մարդկային գոյության իմաստային հիմքեր՝ սահմանելով մարդկային կյանքի ուղղությունն ու շարժառիթը: Մասնագիտական գրականության մեջ գոյություն ունի արքսիոլոգիայի՝ որպես փիլիսոփայական առանձին ուղղության մի քանի տասնյակ սահմանումներ: Կարծում ենք փիլիսոփայական այս ուղղության ամբողջացնող սահմանումը հետևյալն է. արքսիոլոգիան ուսումնասիրում է արժեքային աշխարհի բնութագրերը, կառուցվածքներն ու նրա ճանաչման ուղիներն ու գոյաբանական կարգավիճակը, ինչպես նաև արժեքային դատողությունների բնույթն ու առանձնահատկությունները¹: Աքսիոլոգիայի՝ որպես փիլիսոփայական նոր՝ արժեքներ ուսումնասիրող, կատեգորիայի, ուսումնասիրությամբ զբաղվել են այնպիսի մտածողներ, ինչպիսիք են Ռ. Լոնգեն, Ն. Հարթմանը, Գ. Ռիկերտը, Վ. Վինդելբանդը և այլք:

Արժեքաբանությունը (արքսիոլոգիա) առնչվում է բարոյագիտության, սոցիալական փիլիսոփայության, կրոնի և քաղաքականության բոլոր այն բնագավառների հետ, որոնք գնահատող դատողությունների հետ գործ ունեն²:

Աքսիոլոգիան արժեքը սահմանում է որպես առարկայի իմաստ (կամ դրա նշանակությունը), ի տարբերություն դրա գոյության: Արժեքները լինում են.

- նյութական և հոգևոր,
- արտադրական-սպառողական,
- հասարակական-քաղաքական,
- ճանաչողական և տեղեկատվական³:

Աքսիոլոգիական օբյեկտիվիզմի համաձայն՝ արժեքներն անկախ են մարդուց և մարդկային հասարակությունից: Մինչդեռ արքսիոլոգիական սուբյեկտիվիզմի համաձայն արժեքները մարդուց և մարդկային հասարակությունից անկախ գոյություն չունեն: Համաձայն էսսենցիալիզմի՝ կան իրողություններ, որոնք բոլոր համատեքստերում էլ արժեքավոր են, այնինչ, ըստ կոնտեքստուալիզմի՝ նման

¹ Schroeder M., Value Theory // Stanford Encyclopedia of Philosophy, <http://plato.stanford.edu/entries/value-theory/>, հասանելի է:

² Նույն տեղում:

³ Философия, Учебник для вузов / Под ред. проф. В.Н.Лавриненко, проф. В.П.Ратникова. – М., 2004. С. 603-614.

իրողություններ չկան: Ամեն ինչ արժեքավոր կամ անարժեք է դառնում միայն այս կամ այն կոնկրետ համատեքստում⁴:

Ընդհանուր առմամբ կարծում ենք արժեքը գնահատական է, վերաբերմունք, որը կարող է լինել և՛ դրական, և՛ բացասական: Նեղ ըմբռնմամբ արժեքը իրի, առարկայի, երևույթի, արարքի, գործունեության, վարքագծի դրական նշանակությունն է: Արժեքը կենսականորեն կարևորն է, նշանակալիցը, թանկն ու հարագատը, որը հոգեմտավոր իմաստավորման է ենթարկվում մշակութային սուբյեկտի կողմից և ուղղորդում նրա վարքը որոշակի չափորոշիչների (իդեալ, նպատակ) տեսանկյունից: Այս ըմբռնմամբ արժեքը այն ամենն է, ինչը դրական նշանակություն ունի մարդու համար: Ուստի «բացասական արժեք» արտահայտությունը սխալ է և նման է «բարի-չար», «զեղեցիկ-ուզեղ» բառազույգերին: Դա արժեքի հակարժեքն է, որը բացասական նշանակություն ունի: Օրինակ՝ զեղեցիկը արժեք է, տգեղը՝ հակարժեք, բարին արժեք է, չարը՝ հակարժեք, գիտելիքը արժեք է, տգիտությունը՝ հակարժեք, դաստիարակվածությունը արժեք է, անդաստիարակությունը՝ հակարժեք, և այդպես շարունակ:

Արժեքը առարկայի կամ երևույթի առանձնահատկությունն է, սակայն նրա նշանակությունն ու օգտակարությունը սահմանված չէ բնության կողմից: Այն գնահատվում է ոչ միայն օբյեկտի ներքին կառուցվածքով, այլև հիմնվում է կոնկրետ գործողությունների ժամանակ նրան տրված սուբյեկտիվ գնահատականների վրա, որոնք մտնում են հասարակական ոլորտի մեջ, քանի որ մարդը հետաքրքրված է, կամ ունի դրա կարիքը:

Ընդհանուր առմամբ արժեք ունի այն առարկան, իրավիճակը, հարաբերությունը և այլն, որի ձեռքբերման կամ պահպանման համար սուբյեկտը պատրաստ է որոշակի գոհողություններ կատարել: Մեքենան արժեք ունի, քանի որ մեքենայի համար սուբյեկտը պատրաստ է որոշակի գոհողություններ կատարելու, օրինակ՝ իր մեկ տարվա ողջ աշխատավարձը վճարել, որպեսզի այն ձեռք բերի: Երկու անձանց միջև հարաբերությունն արժեքավոր է այդ անձանց համար, եթե նրանք այդ հարաբերությունը պահպանելու համար ջանք են թափում և այլն:

Մարդկանց համար արժեք ունեցող բազում իրողություններ կան, բայց այդ իրողություններն ունեն տարբեր արժեքներ. մեքենայի

⁴ Բալայան Ա., Փիլիսոփայություն, դասախոսությունների համառոտագրերե, երկրորդ վերամշակված հրատարակություն, Չանգակ հրատ., Ե., 2016, էջ 284:

համար մեկ ամբողջ տարվա աշխատավարձ վճարելու պատրաստակամ անձը գուցե չջանկանա մեկ ամսվա աշխատավարձը վճարել իր ամառային հանգստի համար: Բացի նրանից, որ տարբեր իրողություններ ունեն տարբեր արժեքներ, միևնույն առարկան տարբեր իրավիճակ ներուժկարող է փոխել իր արժեքը: Այսինքն՝ տվյալ առարկայի արժեքը կարող է կախված լինել արտաքին հանգամանքներից: Օրինակ՝ «բանվորի արձանը» ինչպիսի գաղափարաբանություն ու արժեք էր ներկայացնում խորհրդային հասարակության համար, և ինչպես փոխեց իր դերը՝ որպես արժեք, նոր հասարակարգի ձևավորման արդյունքում:

Արժեքները գործում են որպես մարդկային համընդհանուր իդեալ, որպես վերացական գաղափար այն հատկանիշների հիման վրա, որոնք պետք է լինեն սոցիալական կյանքի տարբեր ոլորտներում, որը մշակվում է հասարակության գիտակցության մեջ: Արժեքները լինում են.

- ✓ հավերժական (ճշմարտություն, գեղեցկություն, արդարություն)
- ✓ պատմական (հավասարություն, ժողովրդավարություն):

Արժեքները ներառում են կյանքը, ազատությունը, երջանկությունը, խաղաղությունը, մարդկության կյանքը, արդարության մասին գաղափարները, իրավունքներն ու պարտականությունները, ընտանեկան կապերը, ինքնապահպանման և ինքնահաստատման արժեքները, և այլն:

Արժեքները սերմանվում են մեր մեջ դաստիարակության հետ միասին: Բայց մեր դաստիարակությունը չի ավարտվում ընտանիքով: Մենք շատ բան ենք ստանում մեր ընկերների և շրջապատի մարդկանց հետ շփվելիս: Առավել մեծ ազդեցություն կարող է թողնել մի անձ, որին բոլորից շատ ես հարգում և դա անպայման չէ, որ լինի ընտանիքի անդամ:

«Արժեք» տերմինը արսիոլոգիայում ներառում է ինչպես բնական աշխարհի օբյեկտները, այնպես էլ նյութական և հոգևոր մշակույթը, օրինակ՝ սոցիալական իդեալները, գիտելիքները, արվեստի նկատմամբ վերաբերմունքը, վարքագծի ձևերը, գեղեցկության ու ճշմարտության ըմբռնումը և այլն: Արդեն հին ժամանակներում տեսաբանները որպես հիմնական արժեքներ ներկայացնում էին հետևյալ եռյակը.

- Բարոյականությունը,
- Գեղեցկությունը,
- Ճշմարտությունը

Ժամանակակից ամերիկյան մշակույթի հիմնական արժեքներն են՝

- Անձնական հաջողություն,
- Ակտիվություն և աշխատասիրություն,
- Արդյունավետություն և օգտակարություն,
- Առաջընթաց,
- Իրերը՝ որպես բարեկեցության նշան,
- Հարգանք գիտության նկատմամբ⁵:

Ըստ Սմելցերի՝ արժեքները ընդհանուր առմամբ ընդունված համոզմունքներ են այն նպատակների մասին, որոնց պետք է ձգտի մարդը⁶: Արժեքները կազմում են մարդու բարոյական սկզբունքների հիմքը, տարբեր մշակույթները կարող են նախապատվություն տալ տարբեր արժեքների (հերոսություն ռազմի դաշտում, գեղարվեստական ստեղծագործականություն, ասկետիզմ), և յուրաքանչյուր հասարակական կարգ սահմանում է, թե ինչն է արժեք և ինչը՝ ոչ:

2. Համամարդկային արժեքները, դրանց տեսակները

Աքսիոլոգիական բաժանումների համաձայն, ընդհանուր առմամբ գոյություն ունեն արժեքների հետևյալ տեսակները.

- նյութական (օրինակ, կենսաբանական կարիքներ, տնտեսական բարեկեցություն, ֆիզիկական անվտանգություն);
- ոչ նյութական (արժանապատվություն, հեղինակություն, բարոյական կատարելություն);
- անհատական և խմբակային;
- հիմնական (հիմնական, կենտրոնական) և երկրորդական (ծայրամասային, եզրային);
- գլոբալ և տեղական;
- հասարակական (ընդհանուր սոցիալական) արժեքներ, որոնք կապված են հասարակական կյանքի որոշակի ոլորտի հետ (օրինակ, կրոնական արժեքներ);
- փոխկապակցված արժեքները (ժողովրդավարություն և ազատություն) և

⁵ Хрусталев Ю.М. Философия. – М., 2004. С. 310-331.

⁶ Նույն տեղում, էջ 322:

ժխտողական (արևմտականություն և եվրասիականություն)⁷:

Գոյություն ունեն արդյոք համամարդկային արժեքներ: Աքսիոլոգիան այս հարցին միանշանակ պատասխան չի տալիս:

Հրեա սոցիոլոգ Շ. Շվարցը առանձնացնում է տասը հիմնական արժեքներ, որոնք ճանաչված են բոլոր մշակույթներում: Այս առումով, նրա տեսանկյունից, դրանք կարելի է անվանել համընդհանուր, քանի որ բավարարում են մարդու գոյության երեք հիմնական տեսակի կարիքները.

- կենսաբանական կարիքներ (օրինակ, սերունդ);
- սոցիալական կարիքները (օրինակ, ազնվություն, հավասարություն);
- համայնքային կարիքները - արդյունավետ գործունեության և գոյատևման (օրինակ՝ ազգային անվտանգություն, համաշխարհային խաղաղություն)⁸:

Ընդհանուր առմամբ, կարծում ենք համաշխարհային արժեքը նորմերի կամ վարքագծի օրինաչափությունների խումբ է, որն օգնում է ներդաշնակեցնել մարդկանց համակեցությունը տվյալ պահին: Մրանք որակներ կամ գծեր են, որոնք սոցիալական խումբը համարում է դրական, բայց կարող է տարածված լինել տարբեր մշակույթներում: Համընդհանուր արժեքների օրինակներ են ազնվությունը, համերաշխությունը կամ հանդուրժողականությունը: Այս արժեքները նպաստում են մարդկանց միջև ավելի առողջ գոյակցությանը և փոխանցվում են ընտանիքից և դպրոցից, թեև վերջին տարիներին լրատվամիջոցները (և հատկապես սոցիալական ցանցերը) անժխտելի դեր են խաղացել դրանց տարածման գործում:

Համամարդկային արժեքային համակարգի կարգավորման համար իրավական-կանոնակարգող հիմք են հանդիսանում ՅՈՒՆԵՍԿՕ-ի, Համաշխարհային բանկի, Եվրոպական խորհրդի և այլ միջազգային կազմակերպությունների և կառույցների կողմից ներկայացվող միջազգային համաձայնագրերն ու օրենսդրական ակտերը, որոնք ձևավորում և կազմակերպում, կարգավորում են համաշխարհային, միջազգային

⁷ Баранов Н., Лекция 3. Универсальные ценности в мировой политике, <https://nicbar.ru/politology/study/kurs-rossiya-v-globalnoj-politike/135-lektsiya-6-universalnye-tsennosti-v-mirovoj-politike>, հասանելի է:

⁸ Баранов Н., նույն տեղում:

կրթական տարածքը: Թվարկված կառույցները փորձում են տարածաշրջաններում ինտեգրացիոն եզրեր գտնել, անհրաժեշտ պայմաններ ստեղծել տարբեր երկրների, ժողովուրդների կրթական, մշակութային և համագործակցության համար: Այս մակարդակում որպես գերակայող, բացարձակ արժեք դիտարկվում են «մարդն» ու «կրթությունը»: Կարևորվում են մարդու իրավունքներն ու ազատությունը, հանդուրժողականությունը, անվտանգությունը:

Ամենագլխավոր արժեքներից մեկը **գիտելիքն է**: Գիտելիքի ձևավորման աղբյուրը ընթերցանությունն է, շփումը, հաղորդակցումը, հետաքրքրասիրությունը, նախորդ սերունդների կողմից կուտակված սոցիալական փորձի յուրացումը, սեփական կենսափորձի իմաստավորումը, արդյունքում՝ ինքնահասունացումը, ինքնահաստատումը, ինքնահայեցողությունը՝ ռեֆլեքսիան:

Գիտելիքի երկու ըմբռնում գոյություն ունի՝ լայն և նեղ.

- ✓ լայն իմաստով ըմբռնված գիտելիքը տեղեկատվությունն է շրջապատի, բնության, մարդկային հարաբերությունների, առհասարակ՝ իմացության օբյեկտի մասին, որը հոգևոր գործունեության ձևերում (գիտություն, փիլիսոփայություն, արվեստ և այլն) կարող է դառնալ ուսումնասիրության առարկա;
- ✓ նեղ իմաստով ըմբռնված գիտելիքը հիմնավորված, հավաստի և անսխալ կարծիքն է, որը համապատասխանում է իրերի իրական վիճակին և ունի հիմնավորվածություն⁹:

Ժամանակակից աշխարհում տեղի ունեցող որակական, բովանդակային, անընդհատ ու բազմաթիվ փոփոխությունների ֆոնին գիտելիքը, կարծում ենք համամարդկային կարևորություն ունեցող արժեք է:

Հանդուրժողականություն

<<Ես բոլորովին չեմ կիսում ձեր կարծիքը, բայց կյանքս կտամ հանուն այն բանի, որ դուք այն արտահայտելու հնարավորությունն ունենաք>>: Ֆ. Վոլտեր

Հանդուրժողությունը նշանակում է մեզ շրջապատող աշխարհի մշակութային բազմազանության և մարդկային անհատականության արտահայտչաձևերի տարբերության ըմբռնում և ընդունում: Դրան նպաստում են գիտելիքները,

⁹ Սարգսյան Ա., գիտելիքը՝ որպես արժեք, <http://kargavorum.nkr.am/static/3288>, հասանելի է:

լայնախոհությունը, շփումը, մտքի, համոզմունքների, խղճի ազատությունը: Ժողովրդավարական հասարակարգում ավելի մեծ հնարավորություններ են ստեղծվում մարդկանց անհատական դրսևորման համար: Սա նշանակում է, որ մարդկանց տարբերություններն ավելի ակնհայտ են դառնում: Մյուս կողմից՝ տարբեր երկրների և մշակույթների շփումների ինտենսիվացումը, մարդկանց միգրացիայի աճը, համաշխարհայնացման արդյունքում ինտեգրման միտումները առավել կարևոր են դարձնում հանդուրժողականության գաղափարը: Հանդուրժողականության դրսևորման տարբեր մակարդակներ կան՝

- ✓ Անձնական- արտացոլվում է բարոյականության, բարքերի,
- ✓ Հասարակական- հոգեբանության և գիտակցության մեջ,
- ✓ Պետական –օրենսդրության և քաղաքականության մեջ:

Պետական մակարդակում հանդուրժողականությունը պահանջում է արդարացի և անկողմնակալ օրենսդրություն, իրավակարգի պահպանում վարչական և դատական գործընթացներում: Հանդուրժողականությունը նաև պահանջում է առանց որևէ խտրականության իրավունքներ ապահովել մարդու սոցիալական և տնտեսական զարգացման համար: Շատ կարող է այն հարցը՝ հանդուրժողականությունը սահման ունի՞, թե ոչ: Այսինքն արդյո՞ք կարելի է ամեն ինչ հանդուրժել: Իհարկե ոչ: Հանդուրժողականության սահմանը որոշվում է օրենքներով: Այսինքն՝ պետք է հանդուրժել այն, ինչ օրենքով թույլատրելի է, ինչը մարդու իրավունքների և հիմնարար ազատությունների շրջանակներում է: Փոխարենը անհանդուրժելի են այդ իրավունքների և ազատությունների ոտնահարումները:

- Անհանդուրժողականության դրսևորումներն են.
- Վիրավորանքը, ծաղրը, անտեսումը, արհամարհանքը,
- Բացասական կարծրատիպերը, նախապաշարմունքը ,
- Կանխակալությունը,
- Էթնոցենտրիզմը,
- Հետապնդումը, սպառնալիքները, արտաքսումը,
- Մարդու իրավունքների մերժումը,
- Խտրականությունը, մեկուսացումը,
- Մարդու շահագործումը,
- Ռասիզմը, քսենոֆոբիան, էթնոֆոբիան,
- Ֆաշիզմը,

- Իմպերիալիզմը,
- Կրոնական, մշակութային խորհրդանիշների պղծումը,
- Դավանանքի հետապնդումը կամ դավանանքի պարտադրումը,
- Ապարտեիդը, ոչնչացումը, ցեղասպանությունը:

Անհանդուրժողությունը կանխարգելող ամենաարդյունավետ միջոցը դաստիարակությունն է: Դաստիարակությունը սկսվում է մարդկանց կրթելուց, նրանց՝ իրենց իրավունքների և ազատությունների մասին տեղեկացնելու միջոցով, ինչը կապահովի այդ իրավունքների իրագործումը և կամրապնդի այլ մարդկանց իրավունքների պաշտպանության ձգտումը: Դաստիարակությունը հանդուրժողության ոգով պետք է ուղղված լինի ընդդեմ այն ազդեցությունների, որոնք հանգեցնում են այլ մարդկանց հանդեպ վախի և օտարման զգացողության և պետք է օգնի երիտասարդների մոտ բարոյաէթիկական արժեքների վրա հիմնված անկախ մտածողության և քննադատական գիտակցականության ձևավորմանը:

Արդարություն գաղափարը նույնքան հին է, որքան մարդկությունը: Մարդկությունը դարեր ի վեր խորհել է այն հարցի շուրջ, թե ինչ է արդարությունը և թե ինչպես հետևել դրան: Արդարություն եզրույթը տարբեր կերպ է ընկալվում սոցիալական ու հասարակական տարբեր շերտերի մոտ: Աղքատի ու հարուստի, կնոջ և տղամարդու, իշխողի և իշխվողի համար դրանք տարբեր իմաստներ ունեն: Հասարակության զարգացումը իր հետ բերում է արդարության հետ առնչվող նորանոր խնդիրներ: Այնպես որ կատարյալ արդարությունը դեռևս անհասանելի է: Կյանքում բոլորս էլ, իսկ ղեկավարները՝ առավել հաճախ, ստիպված ենք լինում <<դատավորի>> դեր կատարել, կշռադատել և գնահատել իրավիճակը, փաստարկել, թե ինչն է սխալ, ինչը՝ ճիշտ, ով է արդար, ով՝ մեղավոր: Արդարության գլխավոր արժեքը կայանում է նրանում, որ յուրաքանչյուր կողմ ստանա այն, ինչին ձգտում է:

Արդարությունը հասարակության կողմից պաշտպանության առարկա է, և արդարացի է այն հասարակությունը, որտեղ ստեղծվել ու գործում են արդարությունը ապահովող և պաշտպանող հաստատություններ: Արդարությունը պահպանվում է նախևառաջ բարոյականությամբ՝ խղճով: Սակայն մարդկությունը դեռևս չի կարողանում միայն բարոյականության միջոցով պահպանել արդարությունը և դրա համար ստեղծված են իրավական միջոցներ, որոնք հանդես են գալիս այն ժամանակ, երբ բարոյական նորմերն ի վիճակի չեն կանխել անարդարությունը: Արդարության պահպանման և վերականգնման համար պետությունը ստեղծում է

արդարադատության համակարգ, որի միջոցով վերականգնվում են խախտված իրավունքները և լուծվում վիճելի հարցերը: Սակայն կարևորն այն է, որ և ընտանիքում, և դպրոցում, և այլուր մենք բոլորս սպասում ենք արդար վերաբերմունքի: Սա նշանակում է, որ արդարությունը, լինի դա գիտակցված, թե ոչ, հանդես է գալիս որպես հասարակական հարաբերությունների հիմք և համընդհանուր արժեք:

Բացի այս համընդհանուր արժեք կարող են լինել նաև *նյութական ու հոգևոր մշակութային կոթողները*, արժեքավոր կառույցները:

Մշակութային արժեք հասկացության մեջ ևս կարևոր, եթե ոչ առաջատար դեր ունի հասարակության վերաբերմունքը օբյեկտներին, որոնք ճանաչվում են որպես լոկալ կամ համամարդկային մշակութային արժեքներ:

Ազգի կենսագործունեությունը պայմանավորող վճռորոշ գործոնները հանդիսանում են արժեքները: Ազգի արժեհամակարգ հանդիսանում են այն համակեցության կանոնները, որոնք արտահայտում են ներքին և արտաքին ապրելակերպը: Դրանք հանդիսանում են ազգի ներքին կառուցվածքի՝ էթնոհոգեբանության արտաքին պրոյեկցիան: Հենց հոգևոր արժեքներն են տարբերակում էթնոսի խմբի անդամներին տարբեր ազգի ներկայացուցիչներից: Ազգային արժեհամակարգը տվյալ ազգին դարձնում է ինքնատիպ, առանձնահատուկ մյուս ազգերի նկատմամբ: Դրանք օգնում են իրատեսորեն բացահայտել ազգի պոտենցիալը:

Ազգային արժեքներ

21-րդ դարը հումանիզմի դրսևորման, տեխնիկական առաջընթացի, գիտական ուսումնասիրությունների, տեղեկատվության մեծ հոսքի և զարգացման մի դարաշրջան է, որտեղ ձևավորվում, դաստիարակվում և զարգանում է մերօրյա էթնոկիրը: Ինչպիսի՞ն է ժամանակակից սերունդը, ի՞նչ պահանջումներ, հետաքրքրություններ ունի, ինչպիսի՞ արժեհամակարգով է առաջնորդվում:

Լիարժեք էթնոկրի անձի ձևավորման, նրա սոցիալականացման գործընթացը պատմական տարբեր ժամանակներում տարբեր է եղել՝ պայմանավորված տարատեսակ հանգամանքներով և սկսած տվյալ ժամանակին բնորոշ պատմական իրադարձություններով ու ավարտած մարդկային մտածելակերպի բարդ և անկառավարելի փոփոխություններով: Այս տեսանկյունից 21-րդ դարն էլ

բացառություն չէ: Անկախացման տարիներին Հայաստանին պատուհասած երկրաշարժը, Արցախյան գոյամարտերը, սոցիալ-տնտեսական ճգնաժամերը և քաղաքական արտաքին ու ներքին բազում գործոններն ունեցան իրենց հետևանքները՝ ազգային արժեքների վերաարժևորման ու նորերի կերտման գործում:

Հայը դարեր շարունակ ապրելով առանց պետականության կարողացել է համախմբվել ինչ-ինչ անհատների շուրջ, որոնց արժեքներն ու կերպարները սերնդեսերունդ փոխանցվել են, հարմարեցվել պատմական տվյալ ժամանակաշրջանին ու սերունդների միավորման, հայրենասիրական դաստիարակության հիմքը դարձել: Հայկ Նահապետ, Վարդան Մամիկոնյան, Գևորգ Մարգարեառունի, Դավիթ Բեկ, Անդրանիկ ու Նժդեհ... դարեր շարունակ հենց այս կերպարների շուրջ է համախմբվել հայ ժողովուրդը: Դրանք, անալիտիկ հոգեբանության հիմնադիր Կարլ Յունգի բնորաշմամբ, այն արքետիպերն են, որոնք անհատի կամքից անկախ, դրսևորվում են միֆերում, միթոսներում, կրոնական գրույցներում, երազներում և, իհարկե, արվեստում: Դրանք ունեն համախմբող, միավորող, նշանակություն, եթե դրական ապրումների ու զգացողությունների հիմք են: Ցանկացած արքետիպ, ի վերջո, դրական կամ բացասական որևէ ապրումի, զգացողության արդյունք է, երբեմն նաև՝ պատճառ¹⁰: Անկախության տարիներին, պայմանավորված սեփական հայրենիքի սահմանների ու անձնական անվտանգության կարևորության գիտակցումով, մեզ համար կարևոր արժեք դարձավ բանակը՝ որպես կոլեկտիվ անվտանգության գրավական: 2016 թ. պետական մակարդակով ներդրվեց ազգ-բանակ հայեցակարգը՝ որպես հայ ժողովրդի արժեհամակրգի ձևավորման նորօրյա գործիք:

Յուրաքանչյուր ազգի համար կարևոր արժեքներ են պետական խորհրդանիշները: Հայկական միջավայրի համար հատկանշական է հետևյալ 3 արժեքները.

- մշակույթ
- կրոն
- գիտություն և կրթություն
- Մշակույթի բաղադրատարրերն են՝ լեզուն, ընտանիքը, պարը, երգը:

Անփոխարինելի է սոցիալական տարբեր ինստիտուտների դերակատարությունն ազգային-ավանդական արժեքների պահպանման, փոխանցման

¹⁰ Юнг К. Психология бессознательного. М.: «Издательство АСТ», 2001, стр. 98-101.

գործում: Այս տեսանկյունից մեր հասարակության համար ընտանիքը՝ որպես սոցիալական ինստիտուտներից առաջնայինը, ինքնին կարևոր արեք է: Վերջինս այն հենասյունն է, որ ապահովում է մտավոր ներուժով հարուստ սերունդ ունենալու, ազգային և համամարդկային մշակութային արժեքները պահպանելու և սերնդեսերունդ փոխանցելու, արժեքային կայուն հայացքներ ունեցող, ազգին նվիրված քաղաքացիներ դաստիարակելու, կրթելու գործընթացը: Ինչպես նշում է գերմանացի գիտնական Դյուրկհեյմը, «սոցիալական ինստիտուտների հիմնական նպատակը տիրող մշակութային արժեքների փոխանցումն է»¹¹, որով ոչ միայն ձևավորվում ու զարգանում է նոր սերունդը, այլև հարմարվում է հասարակական կյանքին՝ ձեռք բերելով անհրաժեշտ գիտելիքներ, կարողություններ, հմտություններ, վարքագծային նորմեր, ծանոթանալով և յուրացնելով ազգային և համամարդկային մշակույթը¹²:

Ընտանիքը ոչ միայն տվյալ ժամանակաշրջանի մշակույթի կրողն է, այլև փոխանցողը: Ներընտանեկան ավանդույթներն ու սովորույթներն օգնում են հայեցի դաստիարակություն տալ գալիք սերունդներին՝ նրանց մեջ ձևավորելով ազգային ինքնագիտակցության ոգի: Ինքնության հարցը ներընտանեկան միջանձնային փոխհարաբերություններում դրսևորվում է հենց ազգային ինքնագիտակցության, մայրենի լեզվին տիրապետելու, պապենական արմատները ճանաչելու, Հայ առաքելական եկեղեցու պատկանելության և ազգային սովորույթների պահպանման գործընթացներում¹³: Ընտանիքում է երեխան առաջին անգամ հաղորդակցվում մշակութային արժեքներին, յուրացնում հասարակական վարքագծային նորմեր, կանոններ, իրականացվում երեխայի առաջնային սոցիալականացումը, հարմարումը կյանքին:

Հասարակությունն ի վիճակի է դնելու և լուծելու լայնածավալ ազգային խնդիրներ, երբ ունի բարոյական ուղենիշների ընդհանուր համակարգ: Եվ կան այդ ուղենիշները, որոնք հարգանք են պահում մայրենի լեզվի, ազգային մշակույթի և մշակութային ինքնատիպ արժեքների, նախնիների հիշատակի, սեփական պատմության յուրաքանչյուր էջի նկատմամբ:

Կրթությունը առանցքային դեր է խաղում հասարակության բարոյական և հայրենասիրական համախմբման գործում: Դպրոցը միակ սոցիալական ինստիտուտն է, որով անցնում են Հայաստանի բոլոր քաղաքացիները: Անձնական արժեքները,

¹¹ a study in sociology, https://archive.org/details/suicide0000unse_x5o7 հասանելի է:

¹² Սարգսյան Ա. Հ., Մշակույթի տեսություն, Ե., 2003, էջ 29:

¹³ Налчаджян А. А., Основы этнопсихологии, Е., 2003, с. 179.

իհարկե, առաջին հերթին ձևավորվում են ընտանիքում: Բայց անհատի ամենասպիտեմատիկ, հետևողական ու խորապես բարոյահայրենասիրական զարգացումն ու դաստիարակությունը տեղի է ունենում կրթության ոլորտում: Ուստի դպրոցում է, որ պետք է կենտրոնացվի աշակերտի ոչ միայն մտավոր, այլև հոգևոր, մշակութային կյանքը:

Դպրոցական տարիքի երեխան, հատկապես տարրական դպրոցում, առավել ենթակա է զարգացման և դաստիարակության, սակայն այս զարգացման և դաստիարակության թերությունները դժվար է լրացնել հետագա տարիներին: Մանուկ հասակում սովորածը բնութագրվում է հոգեբանական մեծ կայունությամբ: Ուստի որոշակի արժեքների կրող անհատի ձևավորման գործում հույժ կարևոր դեր ու նշանակություն ունի նաև դպրոցը՝ որպես ողջ հայ հասարակության կյանքում կարևոր դեր կատարող սոցիալական ինստիտուտ: Հենաբար, կարծում ենք, կրթությունը պետք է ուղղված լինի որոշակի իդեալի հասնելուն:

Հստակ է մի բան, որ ոչ մի ազգություն կամ ազգ չի կարող ապրել ու զարգանալ առանձին՝ համաշխարհային քաղաքակրթությունից մեկուսացված՝ հիմնվելով միայն սեփական գիտության, մշակույթի և պատմության վրա: Նրա ազգային գաղափարը չի կարող ձևավորվել ու զարգանալ առանց այլ ազգերի արժեքների, ձեռքբերումների կիրառման, առանց ստեղծագործ ու քննադատական վերլուծության: Ուստի ցանկացած ժողովրդի, ցանկացած ազգի գաղափարական զարգացման գործընթացը չի սահմանափակվում սեփական ձեռքբերումներով, այլ նա ակտիվորեն օգտագործում է այլ ազգերի բացահայտումներն ու ձեռքբերումները: Ժողովրդի մեծությունը դրսևորվում է ոչ թե այլ ժողովուրդներից և ազգություններից պաշտպանվելու, այլ սեփական ազգային գաղափարախոսության մեջ համամարդկային, միջազգային արժեքների արտացոլման, ստեղծագործաբար յուրացված գաղափարական նվաճումների, առաջադեմ մտքերի, այլ ժողովուրդների օրենքների և կանոնների ընդունման մեջ: Համամարդկային ցանկացած արժեք, որն անհամատեղելի է ազգային ինքնության, պատմական ավանդույթների, հոգևոր կարիքների հետ, չի կարող բռնի ուժով ներմուծվել: Մարդկանց գիտակցության մեջ նոր հոգևոր արժեքների ներդրման համար անհրաժեշտ է հասարակության մեջ ձևավորել այդ արժեքների անհրաժեշտությունը և դրանում առաջնային է դաստիարակության ու կրթության դերը:

3. Բարոյական արժեքներ.

Բարոյականությունը սոցիալական գիտակցության ձև է, որը պարունակում է ոչ ֆորմալ սոցիալական նորմեր. հանդես է գալիս որպես սոցիալական հարաբերությունների կարգավորող: Յուրաքանչյուր մարդ իր վարքագիծը բարոյականության տեսակետից խորը գնահատում է՝ որքանով է դա իրեն համապատասխանում, որքանով է բարոյական: Բարոյական արժեքները, հետևաբար, սոցիալական վարքագծի հրամայականներ են, որոնք ունեն ոչ պաշտոնական բնույթ և ծառայում են որպես անհատի վարքագծի ուղեցույց: Այդ իսկ պատճառով դրանք կոչվում են արժեքներ, քանի որ առանց դրանց հնարավոր չէ գնահատել շրջապատող սոցիալական իրականությունը:

Հասարակության մեջ բարոյական արժեքները ներառում են բոլոր հոգևոր արժեքները, հոգևոր մշակույթը: Կրոնը, կրոնական աշխարհայացքը բարոյական արժեքների աղբյուրն է և կազմում է հասարակության հոգևոր կյանքը: Բարոյականության և բարոյական արժեքների առաջացումը պայմանավորված է մարդու երկակի էությանը: Մարդու մեջ իր գոյության ողջ ընթացքում անընդհատ պայքարում են նրա երկու էությունները՝ կենսաբանական և սոցիալական: Մարդիկ, որոնցում կենսաբանական էությունը հաղթում է, սովորաբար արժանանում են հասարակության կողմից մեկուսացման և ընկնում հետագա գոյության անհնարինության մեջ:

Դժվար է պատկերացնել մարդու գոյությունը հասարակության մեջ, եթե, օրինակ, մարդը չկարողանա սահմանափակել իրեն սննդի, սեռական բնագոյների մեջ, եթե չկարողանա զսպել իր ագրեսիան այլ մարդկանց նկատմամբ:

Բարոյական արժեքներն այն առաջնորդող ուղենիշներն են, որ ուղեկցում են մարդուն ողջ կյանքում: Մենք միմյանց գնահատում ենք ոչ միայն և նույնիսկ ոչ այնքան արտաքին տվյալներով, որքան նրանով, թե ինչպիսի մարդ է:

Ըստ էության, բարոյական արժեքները տեսակետներ, զգացմունքներ, հետաքրքրություններ, գաղափարներ, մտքեր ու երևույթներ են: Յուրաքանչյուր մարդ ունի իր արժեհամակարգը և մեզանից յուրաքանչյուրը կառուցում է իր այսպես կոչված «արժեքների բուրգը», որն ամբողջությամբ արտացոլում է անհատի ներաշխարհը:

Այսօր, կարող ենք ասել, որ բարոյական արժեքը նախորդ բաժնում քննարկված արժեքների համալիրն է, որ պայմանավորում է մարդու վարքը, գոյությունն ու հարաբերությունները սոցիալական դաշտում:

Չնայած այն հանգամանքին, որ բարոյապես անբասիր մարդ գոյություն չունի, բարոյապես իդեալական մարդու կերպարը օրինակ է, որին պետք է հետևել: Այս մարմնավորումն արտացոլված է բազմաթիվ կրոնական և գեղարվեստական պատկերներում: Բավական է հիշել Հիսուս Քրիստոսին, Դոն Կիխոտին, արքայազն Միշկինին, Իլյա Մուրոմեցին: Բարոյապես իդեալական մարդու կերպարից բացի, կան բարոյապես անբասիր հասարակության առանձնահատկություններ: Նման հասարակությունը նկարագրվել է փիլիսոփայական և գրական ուտոպիաներում (Տ. Կամպանելլա «Արևի քաղաքը», Թ. Մորի «Ուտոպիայի կղզու գիրքը» և այլ աշխատություններ):

ԵԶՐԱԿԱՑՈՒԹՅՈՒՆՆԵՐ

1. Արժեքաբանությունը (աքսիոլոգիա) առնչվում է բարոյագիտության, սոցիալական փիլիսոփայության, կրոնի և քաղաքականության բոլոր այն բնագավառների հետ, որոնք գնահատող դատողությունների հետ գործ ունեն; Այն արժեքը սահմանում է որպես առարկայի իմաստ (կամ դրա նշանակությունը), ի տարբերություն դրա գոյության: Արժեքները լինում են.
 - նյութական և հոգևոր,
 - արտադրական-սպառողական,
 - հասարակական-քաղաքական,
 - ճանաչողական և տեղեկատվական:
2. Որպես գիտական դիսցիպլին քսիոլոգիան համարվում է փիլիսոփայական մյուս ուղղություններից երիտասարդը: Սակայն արժեքի մասին պատկերացումների ակունքները հասնում են Հին Հռոմ ու Հունաստան: Արժեքը որպես գոյության ձև հին աշխարհում ընկալում էին եռաստիճան համակարգով՝ արժեքավոր համարելով այն, ինչը բարոյական էր, գեղեցիկ ու ճշմարիտ:
3. Աքսիոլոգիան որպես գիտություն փորձում է արժեք հասկացության ու դրա գոյության ամբողջական նկարագիրը տալ: Աքսիոլոգիական բաժանումների համաձայն, գոյություն ունեն նյութական և ոչ նյութական, անհատական և խմբակային, հիմնական և երկրորդական, գոբալ և տեղական, հասարակական և կրոնական արժեքներ, բայց համամարդկային արժեքներ գոյություն ունեն թե ոչ, այս գիտությունը միանշանակ չի տալիս:
4. Մի բան հստակ է, որ պատմական տարբեր ժամանակահատվածներում, կախված հասարակ-քաղաքական իրողություններից ու սոցիալ – տնտեսական հարաբերությունների ձևից արժեքի մասին պատկերացումները փոխվում են: Եվ դա միանգամայն բնականոն գործընթաց է, քանի որ որևէ իրի կամ առարկայի արժեք տվողը դրա հետ կապված գաղափարն է, որ մարդը փոխանցում է իր շրջապատին ու սերունդներին, իսկ երբ գաղափարը կորցնում է իր արդիականությունը, այն կրող առարկան չի կարող արժեքավոր լինել:
5. Բարոյական առաքինությունները՝ մարդասիրությունը, արդարությունը, ավանդույթների պահպանումը, վարքի նորմերը, հարգանքը ծնողների ու մեծահասակների նկատմամբ առողջ բանականությունը, խելամտությունը,

իմաստնությունը, անկեղծությունը, բարյացակամությունը պարտքի զգացումը հավատարմությունը բարոյական արժեքների հիմքն են և պայմանավորում են մարդու գոյությունն ու վարքը հասարակական հարաբերություններում:

ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

1. Բալայան Ա., Փիլիսոփայություն, դասախոսությունների համառոտագրերե, երկրորդ վերամշակված հրատարակություն, Չանգակ հրատ., Ե., 2016:
2. Սարգսյան Ա. Հ., Մշակույթի տեսություն, Ե., 2003:
3. Налчаджян А. А., Основы этнопсихологии, Е., 2003.
4. Философия, Учебник для вузов / Под ред. проф. В.Н.Лавриненко, проф. В.П.Ратникова. – М., 2004.
5. Юнг К. Психология бессознательного. М.: «Издательство АСТ», 2001.
6. Schroeder M., Value Theory // Stanford Encyclopedia of Philosophy, <http://plato.stanford.edu/entries/value-theory/>, հասանելի է:
7. Սարգսյան Ա., գիտելիքը՝ որպես արժեք, <http://kargavorum.nkr.am/static/3288>, հասանելի է:
8. Баранов Н., Лекция 3. Универсальные ценности в мировой политике, <https://nicbar.ru/politology/study/kurs-rossiya-v-globalnoj-politike/135-lektsiya-6-universalnye-tsennosti-v-mirovoj-politike>, հասանելի է:
9. a study in sociology, https://archive.org/details/suicide0000unse_x5o7 հասանելի է: